

«Panica è il pled sbaglià»

Pps grischuna: Radunanza da delegads

DA GION NUTEGN STGIER / ANR


■ **Panica pervia dal clima e la perdita da sez da la pps en auters chantuns n'haja la secziun grischuna insumma betg. Quai ha ditg Heinz Brand, il president chantunal da la pps. Ch'el sa retiria sco parsura da la pps grischuna n'haja el mai ditg, segir na en vista a las elecziuns naziunalas.** In uschè lung pled d'introducziun tar ina radunanza da delegads da la pps grischuna sco gievgia saira a Tavau ha *Heinz Brand* darar tegnì. El n'haja mai ditg ch'el sa retiria proximain sco parsura. Brand ha ditg ch'el sapia bain cura ch'i saja gustifitgà da sa retrair ed il dretg temp da renunziar a quel uffizi. Segir na laschia el la pps da noss chantun betg en il steg er cun avair lieu il mais d'october elecziuns dal parlament federal.

Dispitas n'èn mai bunas

La realitad saja bain che la pps haja pers en intgins chantuns sez en la regenza ed er en ils parlaments. Las medias, quellas n'hajan lura betg scrit ch'èn singuls chantuns haja ella er gudagnà plirs sez. Pers sez hajan er la pld e la pcd e schizunt er la ps. Brand ha punctuà che panica saja en tut cas il pled sbaglià tar la pps grischuna. Dispitas sco avant curt en il chantun Turiutg na sajan dentant mai bunas per ina partida ed er betg per ils electurs e las electuras.

Pps quai è patria

Per avair success tar las elecziuns naziunalas en sis mais haja la pps be da persvader ses commembers, lecturs, lecturas e mintgin da las valurs da la partida. Independenza, neutralitad, dretg dal pievel, suveranità, democrazia ed in cler NA tar l'Uniun europeica, quai sajan aspects



Ils dus referents cun il president da la pps grischuna: Bernhard Lampert, Heinz Brand ed Andreas Züllig (da san.).

FOTO G. N. STGIER

che be la pps stimia. Be ina spassegiada sajan las elecziuns naziunalas 2019 segir betg per la pps da noss chantun. Cun pultronezza na saja bain betg da gudagnar tar elecziuns federalas. El haja constatà che blers commembers da la pps sajan bain in pau pultruns cun ir a votar. A la fin finala saja la pps patria, ha accentuà Brand. Politica da clima, quai ins possia interpretar en pliras modas. Real saja che la pps n'haja betg panica pervia dal clima, er sche quai saja da preschent in tema permanent e da gronda moda. En mintga cas saja i pli prudent d'ir cun calma en las elecziuns naziunalas e da sa concentrar sin las valurs da la pps ed er sin sias prestaziuns.

Cunter il midament da la lescha d'armas ha referì *Bernhard Lampert*, il president svizzer dals veterans da tir. Per la midada da la lescha è vegnì a pled *Andreas Züllig*, il president da Hotelleriesuisse e candidat da la pld per il cussegl naziunal. Envers el èn ils delegads per part sa deputads senza creanza, sco bunamain durant l'entira radunanza. A la fin han ils 60 preschents decidì unanim da refusar ils 19 da matg 2019 il midament da la lescha d'armas.

Pulitas discussiuns

Preschentà la reforma fiscal da taglia e la finanziaziun da l'AVS ha cusseglia naziunala *Magdalena Martullo*. Suentar il referat da la scheffa da l'EMS-Chemia è

suandada ina discussiun emoziunala e cun in nivel plitost bass e malonest. La raschun è che Martullo ha cusseglia als preschents da dar liber la vusch per quella votaziun. Da sia opiniun n'era ina gronda part en la sala betg. Suentar intgins votums cun canera, per e cunter quella reforma, ha lura Brand chattà per pli inditgà d'interrumper la discussiun plain emoziun. Decidì han ils delegads cun 25:22 vuschs da dar liber la vusch per quella votaziun, sco quai che la pps svizra ha er fatg. Per l'iniziativa che vul dismetter la chatscha supplementara aveva la direcziun da la pps grischuna decidì da dar liber la vusch e quai suentar ina discussiun da stgars duas uras.